

CAPUT VI.

MARITI ELECTIO DESCRIPTA.

1. CONSPEXIT ibi hominum regnatores, pulchris vestibus indutos, in soliis, quæ in pulvinis splendide ornatis collocata erant, sedentes, atque deorum, curribus cœlestibus vectorum, pulchritudinis æmulos.

2. Qui cum conspicerent AJAM, KÁMADEVÆ similem cui SIVAS, RATIS precibus cedens, corpus reddiderat, animus eorum spem INDUMATIS obtinendæ abiecit.

3. Juvenis ille per viam gradibus constructam in pulvinum a BHOJA indicatum ascendit, sicut leonis catulus per saxi scopulos in altum montis cacumen.

4. Postquam consederat in solio gemmis fulgente, atque stragulis eximii coloris tecto, pulchritudine sua potissimum comparandus erat KÁRTIKEYÆ, pavonis dorso insidenti.

5. In illo regum cœtu pulchritudo, eximio suo splendore vix intuenda, lucebat millifariam divisa, veluti fulgur in nubium ordinibus.

6. In medio eorum, qui splendidis vestibus ornati in pulcherrimis sellis sedebant, RAGHUIS filius splendore suo elucebat, sicut *Párijátas* arbor inter reliquas arbores cœlestes.

7. Omnes civium oculi, reliquis regibus neglectis, in illum convertebantur sicut apes, arboribus florentibus relictis, considunt in elephanto fero, cujus tempora liquore stillant.

8. Tum regum cœtu, e lunæ solisque familiis oriundo, a præconibus stemmatum peritis celebrato; fumo, qui ex aloe incensa undique adducebatur, ad vexilla ascendente;

9. Solemni instrumentorum clangore e conchis inflatis undique cœli spatia